

# TRANSKRIPT

## 2. IZVANREDNE SJEDNICE DOMA NARODA PARLAMENTA FEDERACIJE BiH, održane 31.03.2015. godine

Sjednica je počela sa radom u 22,26 sati.  
Sjednicom je predsjedavala Lidija Bradara, predsjedateljica Doma naroda.

LIDIJA BRADARA:

Dragi izaslanici, dragi gosti otvaram 2. Izvanrednu sjednicu Doma naroda Parlamenta Federacije BiH.

Još jedanput vam se zahvaljujem na strpljenju, zahvaljujem na svemu što ste danas čekali svo ovo vrijeme, mi smo očekivali da će naša sjednica biti ranije. I hvala vam još jedanput što ćemo ja se nadam večeras uspješno završiti i ovaj dio posla.

Pozdravljam prije svega sve vas nazočne a pogotovo potpredsjednicu Federacije i potpredsjednika Federacije i naravno, predsjednika Vlade, potpredsjednicu Vlade, potpredsjednika Vlade nadam se da je i on tu nisam ih sve popamtila, naše ministre. I još jedanput u ime Doma naroda Parlamenta Federacije iako mi izravno nismo sudjelovali u vašem izboru, ali jesmo kroz izbor predsjednika i potpredsjednika Federacije na izboru na ovu odgovornu dužnost. Nadam se da ćete zajedno s nama predstavnicima zakonodavne vlasti činiti jednu sinergiju i da će naša suradnja u budućnosti biti dobra na dobrobit svih građana i naroda Federacije BiH.

Pozdravljam naravno vas sve izaslanike, predstavnike medija i goste.

Za današnju sjednicu imali smo najavu izostanka, je li imamo iz Stručnih službi? Očito da je bilo prekrakto vremena.

Međutim, prema evidenciji Stručne službe sjednici nazoči 45 izaslanika što čini većinu, pa Dom naroda može raditi i pravovaljano odlučivati.

Vi ste dobili materijale na klupe, nešto ste dobili e-mailom.

Vlada Federacije dostavila je Prijedlog proračuna Federacije BiH za 2015. godinu i Prijedlog zakona o izvršavanju Proračuna Federacije BiH za 2015. godinu s prijedlogom da se razmatraju po žurnom postupku.

Sada je potrebno da se Dom naroda temeljem članka 188. Poslovnika o radu Doma naroda izjasni da li prihvaća da se ovi prijedlozi razmatraju po žurnom postupku?

Stavljam na glasovanje prijedlog Vlade da se Prijedlog proračuna Federacije BiH za 2015. godinu razmatra po žurnom postupku.

Izvolite glasovati.

Tko je za?

Tko je protiv?

Suzdržanih?

Temeljem rezultata glasovanja konstatiram da je Dom naroda Parlamenta Federacije BiH većinom glasova 40 za, bez protiv i 3 suzdržanih prihvatio prijedlog da se Prijedlog proračuna Federacije BiH za 2015.godinu razmatra po žurnom postupku.

Stavljam na glasovanje također prijedlog Vlade da se Prijedlog zakona o izvršavanju Proračuna za 2015.godinu razmatra po žurnom postupku.

Tko je za?

Ima li netko protiv?

Suzdržanih? Zahvaljujem.

Temeljem rezultata glasovanja konstatiram da je Dom naroda Parlamenta Federacije BiH većinom glasova 43 za, 1 protiv i 4 suzdržana prihvatio prijedlog da se Prijedlog zakona o izvršavanju Proračuna Federacije BiH za 2015.godinu razmatra po žurnom postupku.

Prijedlog dnevnog reda ste dobili uz poziv za ovu sjednicu.

Sukladno Poslovniku mislim i vremenu u kojem se nalazimo moram vas pitati da li imate prijedloge za izmjenu i dopunu dnevnog reda? Očito nema.

Prema tome za sjednicu predlažem sljedeći dnevni red:

1. **Prijedlog proračuna Federacije BiH za 2015. godinu – žurni postupak,**
2. **Prijedlog zakona o izvršavanju Proračuna Federacije BiH za 2015. godinu – žurni postupak,**
3. **Prijedlog odluka o davanju suglasnosti:**
  - a) **Financijski plan Zavoda zdravstvenog osiguranja i reosiguranja Federacije BiH konsolidirani za 2015.godinu,**
  - b) **Financijski plan Federalnog fonda solidarnosti za 2015.godinu Aneks 1**
  - c) **Financijski plan Stručne službe Zavoda zdravstvenog osiguranje i reosiguranja Federacije BiH za 2015.godinu Aneks 2**
  - d) **Odluka o načinu izvršavanja Financijskog plana Zavoda zdravstvenog osiguranja i reosiguranja Federacije BiH za 2015.godinu,**
4. **Prijedlog odluka o davanju suglasnosti na Financijski plan Federalnog zavoda za zapošljavanje za 2015.godinu i procjena Plana za 2016. i 2017.godinu:**
  - a) **Odluka o usvajanju Financijskog plana Federalnog zavoda za zapošljavanje za 2015. i procjene Plana za 2016. i 2017. godinu,**
  - b) **Odluku o izvršavanju Financijskog plana Federalnog zavoda za zapošljavanje za 2015. godinu,**
5. **Prijedlog odluke o davanju suglasnosti na prijedlog Financijskog plana Federalnog zavoda za mirovinsko-invalidsko osiguranje za 2015.godinu**

Predlažem da se izjasnite o dnevnom redu.

Izvolite.

Tko je za ovakav dnevni red?

Ima li netko protiv?

Suzdržanih? Zahvaljujem.

Temeljem rezultata glasovanja konstatiram da smo sa 44 glasa za, bez protiv i 4 suzdržana glasa usvojili predloženi dnevni red.

Sada prelazimo na 1. točku dnevnog reda:

**Prijedlog proračuna Federacije BiH za 2015.godinu – žurni postupak**

Zastupnički dom prije početka naše sjednice je usvojio Proračun, ali mi još nismo dobili pismo možda ga vi dobivate sad na klupe.

Projekt Prijedlog proračuna utvrdila je Vlada Federacije BiH.

Prijedlog proračuna ste koliko je meni poznato ranije dobili, tako da Zastupnički dom je usvojio Proračun kao što smo rekli prije 15-tak minuta u tekstu kako ga je predložila Vlada Federacije BiH.

Na Prijedlog proračuna do sada su podnijeli amandmane: zajednički Amandman su podnijeli: gospodin Mustafa Kurtović, Daliborka Milović, Edin Fejzić, Emir Frašto i Sanel Mušović. Amandman se odnosi na razdjel 16 ekonomski kod 614100.

Slobodan Tomić je podnio Amandman na razdjel 614400.

Amandmane smo mi dostavili Vladi na izjašnjavaње.

Da li predstavnik Vlade, tj. naš predsjednik Vlade želi obrazložiti Prijedlog proračuna?

Gospodine Novaliću izvolite.

**FADIL NOVALIĆ:**

Koristim priliku da u svoje ime i u ime Vlade koju zastupam pozdravim cijenje poslanike Predstavničkog doma i Doma naroda Federacije BiH.

Prijedlog budžeta Federacije BiH za 2015.godinu, Prijedlog budžeta za 2015.godinu iznosi 2.334.147,169 KM i za 141,4 milion maraka ili je za 5,7% manji u odnosu na Budžet Federacije prošle fiskalne godine 2014.

Prihodovna strana Budžeta je prvenstveno determinisan projekcijama odjeljenja za makroekonomsku analizu Uprave za indirektno oporezivanje BiH i to kada su u pitanju indirektni porezi. I ona je za nas obavezna za primjenu.

Drugu procjenu na direktnim porezima je uradila pripadajuće Federalno ministarstvo financija i dakle, za direktne poreze i neporezne prihode.

Budžet predviđa suficit tekućeg bilansa od 201.947,574 KM. Znači, operativni Budžet ima suficit, ali uslijed obaveza servisiranja stranog duga putem domaćeg i vanjskog zaduživanja potrebno je namiriti 684.000.000,00 KM. Ovo će se riješiti u okviru primitaka i to kako slijedi, pozajmljivanja.

Sredstva MMF-a IV korak stand by aranžmana je 200 miliona maraka. Sredstva Svjetske banke u iznosu od 54 miliona maraka. Zatim, emitovanje dugoročnih obveznica u iznosu od 110 miliona maraka i emitovanje trezorskih zapisa u odnosu od 320 miliona maraka. Sveukupno iznosi 684 miliona maraka.

Moram istaći da se od planiranih 320 miliona maraka trezorskih zapisa i emisije u istoj godini dospijeva i vraća se 220 miliona, plus dodatnih 100 miliona dospjeva iz 2014.godine, ako saberemo 100 i 220 dobijemo 320 za koliko se zadužujemo. Znači, to je u suštini prolongacija zaduženja.

U ovoj godini dospijeva i 80 miliona od predviđenih 110 miliona dugoročnih obveznica dospijeva 80 miliona, tako da razlika između 110 i 80 operativno iznosi samo 30 miliona. Znači, od ukupnog zaduživanja izvan MMF-a i Svjetske banke od 430 miliona svega 30 miliona je aktivno. Dakle, pozitivna razlika kada se odbije ono što smo dužni vratiti u ovoj godini.

Ovi primitci će se koristiti za servisiranje vanjskog i unutrašnjeg duga u iznosu od 886 miliona maraka i pripadajućih kamata 103, blizu milijardu maraka moramo vratiti ove godine i takva opterećenja otprilike će nas pratiti naredne dvije godine.

Analizirajući rashodnu stranu Budžeta vidjet ćemo da tu nema previše manevarskog prostora jer govorimo o fiksnom Budžetu i to do nivoa 94%. 94% Budžeta je uslovljeno zakonskim rješenjima, transferima, dugovima i svim ovim oktorisanim stvarima. I nama ostaje maneverski prostor od svega 6% ili 120 miliona maraka.

Gdje možemo uštedjeti? Jedina prilika i jedina pozicija gdje možemo uštedjeti jeste na poziciji plaća za 7.372 osobe je predviđeno 194,9 miliona maraka što predstavlja povećanje u odnosu na 2014. Što nije u skladu naravno s našom percepcijom da moramo smanjivati javnu potrošnju. I povećanje od 3,7 miliona maraka ili 2% a razlog je što je odlazeća godina za prethodnu garnituru gdje oni koji nisu uspjeli naći posao dužni smo im isplaćivati još godinu dana pripadajuću platu.

I naravno, razlog leži još u realizaciji seta zakona koji se odnose na Federalno tužilaštvo i Vrhovni sud Federacije BiH i ono što je započela prethodna Vlada valja finansirati u narednom periodu.

Naravno, mi smo u ovoj stavci obećali kroz smanjenje javne potrošnje smanjenje troškova, tako da kroz obustavljanje novog zapošljavanja i eventualno da kažem određeno smanjenje materijalnih troškova ovu stavku ćemo svakako pokušati smanjiti i ona nam je jedina koja je varijabilna na koju bismo mogli postići neke rezultate.

Kada su u pitanju transferi ističem da Budžetom za 2015.godinu predviđena nepromijenjena politika kada su u pitanju transferi prema Fondu penzijskog i invalidskog osiguranja, to je cijelih 215 miliona maraka, tu nemamo zakonskog prostora da biramo šta umanjujemo.

Također transferi prema RVI održat će dostignuti nivo prava, isto vrijedi i za transfere za poljoprivredu i kategoriju raseljenih lica i povratnika. Ukratko, Prijedlog budžeta garantuje pravovremene isplate dostignutih prava što smo se obavezali u nekom ekspezu da ćemo socijalna davanja zadržati na istom nivou.

Kao što sam ranije rekao Budžet Vlade Federacije 94% unaprijed je determinisan, a samo 120 miliona ili 6% ostaje varijabilno za neku upotrebu, neku strategiju Vlade za raspoređivanje sredstava ali i to ide za poljoprivredu, posebno poljoprivredi i Transferi za raseljena lica. Tako da se pitamo i da li i tu postoji maneverski prostor za neko određivanje Budžeta. Dakle, veoma su smanjene mogućnosti upotrebe Budžeta za ono što smo nazvali ekonomskom reformom.

Vlada će se naravno ponašati u skladu sa načelima restriktivne fiskalne politike. Uslijed povećanog servisiranja duga imamo potrebu za finansiranje u iznosu od 684 miliona maraka, toliko nedostaje u Budžetu i to je ono što smo rekli da ćemo pokriti iz primitaka. No, ipak zbog velikog opterećenja vraćanja po osnovu u iznosu otprilike jedne milijarde ove i naredne dvije godine prinuđeni smo postojeći stand by aranžman zamijeniti uz saglasnost MMF-a za tzv. Extended Fund facility aranžman koji predstavlja zamjenu kratkoročnog stand by aranžmana za srednjoročno i dugoročno finansiranje kako smo dobili da održimo budžetsku disciplinu i da zadovoljimo socijalna davanja jer Budžet dominantno socijalan.

Da bismo to postigli potrebno nam je aranžman sa MMF-om. I naravno, po okončanju ovih pregovora i sklapanja aranžmana nameće se...

(FADIIL NOVALIĆ):

... nameće se potreba za izradu Rebalansa budžeta, ali moram znači razočarati sve one koji misle da i prethodni Dom je mislio da možemo to sve uraditi u mjesec dana najmanje tri mjeseca će trajati pregovori sa MMF-om znači a MMF vidjeli ste u strukturi prihoda na primicima znači ako hoćemo bilo šta raditi na rashodnoj strani moramo prije zadovoljiti prihodnu stranu, prema tome postoji realno znači problem znači brzine i naše želje da uradimo Rebalans ovog budžeta koji je realno hajdemo priznati sami sebi nismo ga uradili mi je tako.

Budžet je socijalni. Takav će biti još neko vrijeme. Znači daleko je od razvojnog budžeta to moramo prihvatiti na kraju krajeva prevelika su očekivanja od Federalnog budžeta koji ima aktivne prihode oko milijardu i 700 je li ostalo su primici i da kažem u odnosu na budžete kantona budžete opština ne predstavlja znači neku važnu polugu pomoću kojih možemo raditi ekonomsku reformu i da vam još napomenem da lavovski dio ide u vanbudžetske da kažem fondove milijardu 850 miliona ide u penzioni i milijardu 70 miliona ide u zdravstveni fond tako da su ta dva fonda daleko jači dakle od Budžeta Federacije i možda više predstavljaju polugu za neke reforme nego li sam Budžet Federacije.

Investicije i kapital dakle angažiraćemo drugim instrumentima i načinom i o tome ste imali priliku slušati ko je već slušao osnove mog ekspozicea. Hvala vam na pažnji i stojim vam na raspolaganju za određena pitanja.

LIDIJA BRADARA:

Zahvaljujem predsjedniku Vlade i otvaram raspravu po pitanju Proračuna Federacije Bosne i Hercegovine za 2015. godinu.

Je li se javlja netko za riječ?

Koliko ja vidim, izvolite.

Gospodin Mustafa Kurtović, izvolite.

MUSTAFA KURTOVIĆ:

Delegatkinje i delegati, poštovani ministri unovljeni premijeru. Prvo čestitam vam na imenovanju pozdravljam i medije.

Istovremeno ovo je po ko zna koji put da mi iz Goražda i ne tražimo ništa samo tražimo ovo što premijer stalno ističe i svi ostali ustavnu ravnopravnost federalnih jedinica u Federaciji Bosne i Hercegovine i ostvarivanje funkcija koje zahtjeva Ustav Zakon o principima lokalne samouprave, Zakon o federalnim jedinicama a to je minimum od dodatna tri miliona po Amandmanu koji smo uložili nas pet delegata iz Bosansko-podrinjskog kantona Goražde i mi ne odustajemo od ovog amandmana. Hvala.

LIDIJA BRADARA:

Zahvaljujem.

Ima li još zainteresiranih.

Gospodin Predrag Kojović.

PREDRAG KOJOVIĆ:

Zahvaljujem predsjedavajuća i pozdravljam sve prisutne.

Ja moram priznati da sam iznenađen ovim iako naravno svi smo imali jedan dug beskrajno dug dana pogotovo ljudi koji su bili u Skupštini kantona Sarajevo gdje smo takođe danas usvajali budžet ovim depresivnim tonom premijera koji se predstavio ili predstavio Budžet kao da je on jednostavno neki stečajni izvršilac budžeta govoreći o tome kako je socijalan.

Poštovani premijeru naš problem upravo jeste u načinu na koji koristimo sredstva za socijalnu pomoć. Ja se nadam da ste vi famelijarni sa svim analizama koje kažu da 80% sredstava iz socijalnih fonoda ide ljudima kojima socijalna pomoć uopšte nije potrebna. I da bi ukidanje socijalnih davanja povećalo siromaštvo samo za 1% u Bosni i Hercegovini.

I ja sam očekivao da ćete vi ovdje upravo govoriti na toj frekvenciji znači šta ćete vi uraditi da se taj socijalni sistem da napokon postane pravedan.

Druga stvar koju ste spomenuli je penzijski invalidski fond. Vi ste svjesni da u našem penzijskom sistemu kako je organizovan kao međugeneracijske solidarnosti ima više od 30% ljudi koji ne ispunjavaju uslove da budu u tom fondu. I da su penzije ljudi koji su svoje penzije zaradili radom značajno manje zbog prisustva tog broja ljudi.

Mi smo svjesni problema koje ste vi iznijeli ovdje. Oni su postojali i u prošlom mandatu ali zato se održavaju izbori kako bi pobijedili ljudi koji imaju neke nove vizije i koji imaju neka nova rješenja za probleme koje mi svi znamo....toga premijera po meni nije da bude računovođa koji će kao protočni bojler primati novac porezskih obveznika i raspoređivati ga prema zakonskim obavezama.

Upravo se o tome i radi da su zakonske obaveze koje su stvarane nerealne, nemaju ekonomskog osnova i mi već ko zna koji mandat čekamo da dođe Vlada koja će imati hrabrosti da kaže ljudima da ovako kako smo živjeli do sada ne možemo više živjeti.

Na kraju krajeva taj deprimirajući spisak primitaka kojih ste naveli u prihodovnoj strani budžeta nije rješenje za naš budžet četvrta tranša Međunarodnog monetarnog fonda niti uzimanje komercijalnih kredita.

Uštede se moraju i niti je rješenje eventualno u smanjenju nekih nekom simboličnom sniženju plata u administraciji.

Nama su neophodne ozbiljne radikalne reforme u kojima neko mora zaista imati hrabrosti da pogleda ovu naciju Bosanaca i Hercegovaca u oči i da im kaže da ovako kako imamo i ovakav sistem i način na koji se ponašamo u tom sistemu nije održiv i da nas vodi u potpunu propast.

I meni je žao što nisam čuo neku viziju ili najavu nečega što bi išlo u tom smjeru. Hvala.

LIDIJA BRADARA:

Zahvaljujem.

Ima li još zainteresiranih? Iva, gospodin Iva Tadić.

IVO TADIĆ:

Gospođo predsjedavajuća, gospodine predsjedniče Federacije dopredsjednici kolege zastupnici poštovani gosti, mediji koristim priliku i sve vas pozdravljam.

Na poseban način želim pozdraviti premijera i novoizabrane ministre i svima vama odnosno svima nama želim uspješan rad u predstojećem mandatu.

Naravno da nemam namjeru s obzirom na vrijeme, okolnosti i sve ostalo raspravljati o Proračunu, međutim, ipak smatram da s obzirom na okolnosti u kojim je donešen Proračun da bi ovaj Parlament trebao ispred hrvatskog Kluba predložem da nam Vlada u naredna dva mjeseca ponudi Rebalans ovog proračuna i da to uđe u zaključak prilikom donošenja Proračuna.

Hvala.

LIDIJA BRADARA:

Gospodin ...

FUAD HADŽIMEHMEDOVIĆ:

Uvažena predsjedavajuća, predsjednici, potpredsjednici Federacije, premijeru, članovi Vlade.

Smatram da je dužnost nas koji smo ovdje bili suzdržani prilikom glasanja o ovom postupku da to ukratko pojasnimo. Ne bih ulazio u Budžet. Dakle, zahvaljujem se premijeru koji nas je obavijestio da je utvrđeno ono što smo mi dobili prije nekoliko dana. Ovo što mi imamo pred sobom utvrdila je Vlada koja je imenovana, odnosno potvrđena u 19 sati i za samo sat vremena nam ponudila Budžet. To je super Vlada ja vjerujem ili nadam se da ćemo za dva mjeseca nećemo imati Rebalans budžeta, mi ćemo imati super zemlju koja će biti članica EU. Naravno, malo sam ovdje skeptičan, pa ako želim da kažem da nije bilo potrebe za ovakvim načinom donošenja Budžeta. I iz tog razloga moje kolege i ja smo suzdržani. Naravno, znamo da je potrebno donijeti Budžet u zakonom propisanom roku i nećemo previše se miješati u ovo. Nadam se da će Vlada zaista donijeti Budžet koji će biti Budžet ove Vlade.

I želim vam, želim nam svima puno sreće u radu u budućem periodu.

Hvala.

LIDIJA BRADARA:

Zahvaljujem.

Gospodin Aner Žuljević.

ANER ŽULJEVIĆ:

Zahvaljujem predsjedavajuća.

Ja znam da je kasno, prvo bih iskoristio priliku da čestitam i premijeru i novoj Vladi da im zaželim uspjeh u budućem radu.

Ja neću govoriti puno o Budžetu, pokušat ću da budem što kraći. Meni je drago da smo se mi iz one sfere da kažem predizborne retorike koja je trajala i nakon izbora gotovo tri mjeseca vratili u potpunu realnost svakodnevnice, pa ono što danas

imamo od premijera ustvari pokazuje da smo ono što kaže ponovno trehnuli od pod i da sad trebamo ponovno da počnemo raditi.

Mene ovdje prvo što me je zateklo jeste da premijer kaže u svom obrazlaganju Budžeta da tri mjeseca minimalno mu treba za Rebalans, onda izađe koalicijski partner i kaže da od premijera traži da to dostavi u roku od 60 dana. U redu, to sve ide u onaj sistem nekih pet mjeseci pregovaranja, dogovaralo se ko će gdje sjesti. Ja očekujem u narednom periodu u interesu sviju nas ovdje i Vlade i svih dobronamjernih koji žele da pomognu ovoj Vladi u narednom periodu u interesu građana i boljeg stanja u Federaciji da sada koalicijski partneri sjednu i da konačno dogovore kako i na koji način bude ono što na nivou retoričkog dijela u izlaganju najvećim dijelom premijera. Ono što je rečeno ja sam imao priliku da vidim u restoranu na televiziji bilu je tu i hrabrih izjava, one nisu još nisu konkretizirane u obliku papira, ali ova nekoordinacija koja se do sada pojavila ne uljeva neku nadu u buduće periodu.

Što se tiče Budžeta s obzirom da se radi o nečemu što je potpuno identično, odnosno onome što je predložila prethodna vlada mi ćemo taj Budžet podržati.

Toliko i zahvaljujem.

LIDIJA BRADARA:

Zahvaljujem.

Ima li još zainteresiranih?

Izvolite gospodine Mitroviću.

ŽELJKO MIRKOVIĆ:

Ja Mirković, nisam Mitrović.

Gospođo predsjedavajuća, uvažene kolegice i kolege delagati u Domu naroda, predstavnici medija, međunarodnih organizacija, uposlenici Parlamenta Federacije sve vas skupa pozdravljam.

Evo, slušamo sada premijera malo prije kako govori o Budžetu stvarno mislim da ustvari ovaj premijer i ova Vlada ima prostora samo 6%. Znači, nema više i to je potpuno jasno. Kaže, pogledaj koliki je ukupan Budžet, to je vrlo, vrlo malo prostora za bilo šta učiniti. Čujem reforme, ne znam koje reforme? Ja bih volio čuti o kojim reformama se radi? Vi znate da je mislim 01. februara stupio na snagu set antikoruptionih zakona. Ja bih volio da je u paketu reformi upravo primjena implementacija tog zakona. Neki dan sam imao priliku da pročita gospodina Arifovića izjavu vezano za opštu situaciju kada je u pitanju ubiranje poreza i njegovo viđenje bogataša koji se nalaze u BiH. Činjenica da postoji 9,5 milijardi KM na štednji. To je jedan prilično veliki iznos kada pogledamo ukupno kretanje finansijska u BiH cijeloj, a naročito u Federaciji koja se tiče upravo ovoga Doma. Međutim, ja kažem čast izuzetcima i čast onome ko je svoje bogatstvo zaradio pošteno i to treba u svakom slučaju podržavati. I ja kada govorim ovo ne mislim na ljude koji su svoj imetak stekli svojim radom, svojom pameću i svojom inteligencijom. Ja govorim onima koji nisu stekli imetak na ovaj način, nego su ga stekli na kriminalan način.

Ja stoga želim da ovdje čujem od premijera da li on misli se pozabaviti upravo s tim momentom jer mislim da na strani kriminala postoje milioni i stotine miliona KM u koje država jednostavno ne gleda. Ja nisam čuo da se iko želi baviti sa tim u



Federaciji BiH, a mi otprilike dobro znamo o čemu ja govorim ovdje. Čuo sam da se poseže za smanjenjem plata. Mislim da je to efekat koji će biti dugoročno gledajući umanjiti potrošnju, potrošnja će umanjiti i porez i PDV i potražnju i proizvodnju itd. i mislim da to meni liči na gašenje požara benzinom. To mislim da nije ni malo pametno raditi u ovom trenutku. I ja mislim da ova Vlada se treba pozabaviti kako podržati potrošnju na odgovarajućem nivou kako bi na neki način i Vlada imala odakle puniti ovaj Budžet.

Prema tome, moje ključno pitanje je šta će država, odnosno šta će ova Vlada preduzeti po pitanju upravo korupcije jer smanjenjem plata mi potićemo korupciju. Zadržavanjem nekog da kažem standarda ta korupcija, odnosno oni ljudi koji treba da vrše javne ovlasti koji rade u državnim organima su manje podložni toj korupciji. Ovdje je problem korupcije broj jedan i broj dva kriminala. Pogledajte ko je uz vlast, pogledajte osobe koje su uvijek uz vlast bilo da je to ova vlast, neka prije nje ili ona prije nje uvijek ćemo vidjeti da su to ustvari isti ljudi. Oni su dobro naučili kako igrati uz vlast i kako se održavati pomoću novca o kojem ja sada pričam koji se ne bi trebao nalaziti na njihovim računima i njihovim džepovima, nego bi se trebao nalaziti na računu Federalne vlade, na računu svih onih potreba. I da ne bude to 6%, nego da to bude možda nekih 20 ili 30% prostora...

(slijedi traka 3)

(ŽELJKO MIRKOVIĆ):

...prostora koja se međusobno Vlada može kretati. Ovako, ovaj Budžet ja ne bih nazvao ni socijalni ja bih ga nazvao Budžet za puko, puko preživljavanje. I ovo što se misli uzeti od MMF-a i ovo što se misli emitovati kroz obveznice i trezorske zapise zovite ih kako hoćete to će doći dan kada će se morati vraćati, a ja se pitam odakle će se vraćati to je za narednih nekoliko godina kad to dođe na dnevni red. Prema tome, ja premijeru od vas očekujem da se upravo pozabavite i da pročitate ovu izjavu gospodina Arifovića direktora uprave za indirektno oporezivanje i da vidite kako staviti sistem u pogon i novac pronaći kod onih koji su u nezakonito stekli i na taj način uspostaviti i red i finansijsku stabilnost u ovoj državi. Možda ovo vama izgleda ovako više kao utopija, ali ja želim dok sam u ovom Domu naroda naredne četiri godine često slušati priču upravo na ovu temu. Evo hvala vam lijepo.

LIDIJA BRADARA:

Zahvaljujem.

Ima li još zainteresiranih za raspravu.

Koliko vidim da nema.

Zaključujem raspravu.

Molim predsjednika Vlade da se izjasni u vezi amandmana koji su zajednički podnijeli Mustafa Kurtović, Daliborka Milović, Edin Fejzić, Emir Frašto i Sanel Mušović i amandmanu gospodina Slobodana Tomić i naravno da se očitujete o svim ovim raspravama.

():

Hvala predsjedavajuća.

Valda Federacije je na prvoj hitnoj sjednici razmatrala amandmane delegata u Domu naroda FBiH i dakle delegata Slobodana Tomića dva amandmana delegata iz BPK Goražde jedan Amandman i ranije pomenute amandmane i Vlada jednoglasno odbila predložene amandmane. Zvuči loše, međutim, samo molim vas da shvatite u kakvom tehničkom problemu Vlada je li Federacije koja bi da je usvojila jednu od ovih amandmana kako bi to tehnički ugradila u materijal je li koji je naime Budžet Federacije, ne bismo to mogli uraditi do ponoći. Isto smo i na Predstavničkom domu Federacije obećali da ćemo ove znači, amandmane uzeti u obzir na prvom rebalansu Budžeta Federacije. Znači, u pitanju je neodbitanje znači u stvarnom smislu zato što nismo zato nego nemamo vremena provesti bilo kakvu promjenu čak i da je donesemo kao pozitivnu. I u tom smislu iz tog razloga je Vlada Federacije odbila sve te amandmane. Hvala vam.

LIDIJA BRADARA:

Molim, budući da nisu amandmani prihvaćeni od strane Vlade molim podnositelje da se izjasne da li odustaju ili ne odustaju od ovih amandmana.

Tko će prvi?

Grupa predlagača (upadica) ostajete pri. Gospodine Tomić, dobro.

Znači, sada predlažem amandmane na glasovanje. Znači, prvo ćemo se izjasniti o amandmanima koji su zajednički podnijeli Mustafa Kurtović, Daliborka Milović, Edin Fejzić, Emir Frašto i Sanel Mušović.

Stavljam ovaj Amandman na glasovanje.

Tko je za?

Ko je protiv?

Suzdržanih?

Zahvaljujem.

Konstatiram da amandman gospode Mustafe Kurtović, gospođe Daliborke Milović, Edina Fejzića, Emira Frašte i Sanela Mušovića nije dobio potrebnu većinu, jer smo imali 20 glasova za, 1 protiv i 24 suzdržana glasa.

Sada dajem na izjašnjenje Amandman gospodina Slobodana Tomića.

Tko je za?

Protiv?

Suzdržanih?

Konstatiram da i ovaj Amandman nije dobio potrebnu većinu, jer je bilo 11 za, 7 protiv i 25 suzdržanih.

Sada stavljam na glasovanje Prijedlog Proračuna FBiH za 2015. godinu.

Tko je za?

Tko je protiv?

Suzdržanih?

Zahvaljujem.

Temeljem rezultata glasovanja konstatiram da je Dom naroda Parlamenta Federacije BiH većinom glasova 42 za, 5 protiv i 4 suzdržana usvojio Prijedlog Proračuna FBiH za 2015. godinu.

Gospodine Tadiću odustajete li vi od svog Prijedloga zaključka?

IVO TADIĆ:

Ja ne odustajem. Ja bih ipak da se Parlament izjasni. Međutim, još jedanput bih volio čuti premijera ako zaista smatra da je to kratak rok, međutim ja mislim da je dovoljno, ako ne, da idemo na 90 dana i da se Parlament izjasni.

LIDIJA BRADARA:  
Zahvaljujem.  
Premijeru izvolite.

FADIL NOVALIĆ:

Pa 90 dana nije moja volja, mislim u pregovorima sa MMF-om su nam uspostavili određeni tajming i on traje 90 dana. Znači, jednostavno je to, a vidim da ga imamo na premicima, prema tome ne možemo govoriti Rebalansu ukoliko ne možemo zatvoriti primitke je li. Tako da mislim, to je jednostavno tehnika i tehnički okviri pregovora sa MMF-om. Unutar toga imamo još dosta problema evo sad razgovaram sa ministricom unutar toga vjerovatno kao predhodne mjere imaćemo izmjenu dva Zakona, Zakon o radu i Zakon o državnim službenicima koje će biti prethodna mjera i za te takve pregovore i upravo ta kost u grlu je najveća baš na ovoj Vladi na početku. Tako da bi sve drugo bilo veoma optimistično. Hvala.

LIDIJA BRADARA:  
Gospodine Tadiću recite.

IVO TADIĆ:

Pa evo ne znam malo sam zbunjen, ali zaista ponavljam još jedanput s obzirom na okolnosti u kojem je donesen Proračun, mislim da bi trebali dati rok Vladi i da u roku od 90 dana ponudi nam rebalans Proračuna.

LIDIJA BRADARA:  
Stavljam ovaj Zaključak na izjašnjavanje.

Tko je zato da se Vlada obveže da u roku od 90 dana donese izmjene i dopune Proračuna za 2015. godinu?

Tko je za?  
Protiv?  
Suzdržanih?  
Zahvaljujem.

Konstatiram da smo temeljem rezultata glasovanja usvojili Zaključak, da Vlada Federacije u roku od 90 dana najkasnije donese izmjene i dopune Proračuna za 2015. godinu, sa 33 glasa za, 13 protiv i 10 suzdržanih. (upadica) Je li imate dva zastupnika koja vas podržavaju? Samo vi polako. Izvolite tajniće.

IZMIR HADŽIAVDIĆ:

Hvala predsjednice. U skladu sa odredbom člana 113. Poslovnika o radu Doma naroda obavljamo poimenično izjašnjavanje o Zaključku kojim se obavezuje Vlada FBiH da u roku od 90 dana dostavi u parlamentarnu proceduru izmjene i dopune Budžeta FBiH za 2015. godinu.

(prozivka)

(tonski snimak prozivke je sastavni dio transkripta)

(nakon prozivke)

IZMIR HADŽIAVDIĆ:

I prema mojoj evidenciji 33 za, ali moramo prema Poslovniku prozvati delegate koji su bili odustni.

(prozivka)

(tonski snimak prozivke je sastavni dio transkripta)

(nakon prozivke)

LIDIJA BRADARA:

Konstatiram da smo pojedinačnim glasovanjem utvrdili 33 za, 7 protiv i 11 suzdržanih. Zahvaljujem.

**Prelazimo na 2. točku dnevnog reda a to je:**

**Prijedlog Zakona o izvršavanju Proračuna FBiH za 2015. godinu – žurni postupak**

Prijedlog Zakona utvrdila je Vlada Federacije. Prijedlog Zakona ste dobili. Zastupnički dom je na 5. Izvanrednoj sjednici od večeras usvojio Prijedlog Zakona o izvršavanju Proračuna Federacije za 2015. godinu u tekstu kako ga je predložila Vlada Federacije, dopis Zastupničkog Doma ste dobili u međuvremenu na klupama. Pozivam predsjednika Vlade da obrzloži Prijedlog Zakona ako ima potrebe? Nema. Zahvaljujem.

Otvaram raspravu po ovoj točki dnevnog reda. Ima li zainteresiranih. Nema. Zaključujem raspravu.

Stavljam na glasovanje prijedlog Zakona o izvršavanju Proračuna Federacije za 2015. godinu.

Tko je za?

Netko protiv?

Suzdržanih?

Temeljem rezultata...

(slijedi traka 4)

(LIDIJA BRADARA):

...Temeljem rezultata glasovanja konstatiram da je Dom naroda Parlamenta Federacije BiH sa 44 glasa za, 1 protiv i 4 suzdržana usvojio Prijedlog zakona o izvršavanju Proračuna Federacije BiH za 2015.godinu.

Prelazimo na 3. točku dnevnog reda, a to je:

Prijedlog odluka o davanju suglasnosti:

- a) **Financijski plan Zavoda zdravstvenog osiguranja i reosiguranja Federacije BiH konsolidirani za 2015. godinu,**
- b) **Financijski plan Federalnog fonda solidarnosti za 2015. godinu**
- c) **Financijski plan Stručne službe Zavoda zdravstvenog osiguranje i reosiguranja Federacije BiH za 2015. godinu**
- d) **Odluka o načinu izvršavanja Financijskog plana Zavoda zdravstvenog osiguranja i reosiguranja Federacije BiH za 2015. godinu**

Planove je dostavila Vlada Federacije radi razmatranja i davanja suglasnosti. Zastupnički dom je na 5. Izvanrednoj sjednici od 31.03.2015.godine donio Odluku o davanju suglasnosti na ove planove i Odluku.

Da li predstavnik Vlade ima potrebu obrazlagati? Ne.

Zavod za zdravstveno osiguranje? Ne.

Otvaram raspravu.

Zaključujem raspravu.

Stavljam na glasovanje Prijedlog odluka o davanju suglasnosti na Financijski plan Zavoda zdravstvenog osiguranja i reosiguranja Federacije BiH konsolidirani za 2015. godinu.

Tko je za?

Protiv?

Suzdržanih?

Na temelju rezultata glasovanja konstatiram da je Dom naroda Parlamenta Federacije BiH sa 48 glasova za, bez protiv i 4 suzdržana donio Odluku o davanju suglasnosti na Finansijski plan Zavoda zdravstvenog osguranja i reosiguranja Federacije BiH za 2015. godinu.

Stavljam na glasovanje prijedlog Odluke o davanju suglasnosti na Financijski plan Federalnog fonda solidarnosti za 2015. godinu.

Tko je za?

Protiv?

Suzdržanih?

Na temelju rezultata glasovanja konstatiram da je Dom naroda Parlamenta Federacije BiH većinom glasova 40 za, bez protiv i 4 suzdržana donio Odluku o davanju suglasnosti na Finansijski plan Federalnog fonda solidarnosti za 2015. godinu.

Stavljam na glasovanje prijedlog Odluke o davanju suglasnosti na Financijski plan Stručne službe Zavoda zdravstvenog osiguranje i reosiguranja Federacije BiH za 2015. godinu Aneks 2.

Izvolite glasovati.

Tko je za?

Protiv?

Suzdržanih?

Na temelju rezultata glasovanja konstatiram da je Dom naroda Parlamenta Federacije BiH većinom glasova 47 za, bez protiv i 4 suzdržana donio Odluku o davanju suglasnosti na Financijski plan Stručne službe Zavoda zdravstvenog osiguranja i reosiguranja Federacije BiH za 2015. godinu Aneks 2.

Stavljam na glasovanje prijedlog Odluke o davanju suglasnosti na Odluku o načinu izvršavanja Financijskog plana Zavoda zdravstvenog osiguranja i reosiguranja Federacije BiH za 2015. godinu.

Izvolite glasovati.

Tko je za?

Protiv?

Suzdržanih? Zahvaljujem.

Na temelju rezultata glasovanja konstatiram da je Dom naroda Parlamenta Federacije BiH sa 47 glasova za, bez protiv i 4 suzdržana glasa donio Odluku o davanju suglasnosti na Odluku o načinu izvršavanja Financijskog plana Zavoda zdravstvenog osiguranja i reosiguranja Federacije BiH za 2015. godinu.

Zahvaljujem.

I prelazimo...

(slijedi traka 5)

(LIDIJA BRADARA):

...četvrtu točku dnevnog reda, a to je Prijedlog Odluke o davanju suglasnosti na finansijski plan Federalnog Zavoda za zapošljavanje iz 2015. godinu i procjena plana za 2016. godinu, pod

b) Odluku o usvajanju finansijskog plana Federalnog Zavoda za zapošljavanje za 2015. godinu i procjene plana za 2016. i 2017. godinu i pod

c) Odluku o izvršavanju finansijskog plana Federalnog Zavoda za zapošljavanje za 2015. godinu.

Plan i odluke je dostavila Vlada Federacije radi razmatranja i davanja suglasnosti. Zastupnički dom je na 5. izvanrednoj sjednici od 31. Ožujka donio odluku o davanju suglasnosti na plan i odluke. Da li predsjednik Valde želi nešto reći? Da li predstavnik Federalnog Zavoda za zapošljavanje? Ne. Otvaram raspravu. Zatvaram raspravu.

Stavljam na glasovanje Prijedlog Odluke o davanju suglasnosti na finansijski plan Federalnog Zavoda za zapošljavanje za 2015. godinu i procjenom plana za 2016. i 2017. godinu.

Tko je za?

Protiv?

Suzdržanih?

Na temelju rezultata glasovanja konstatiram da je Dom naroda Parlamenta Federacije većinom glasova 47 za, bez protiv i 4 suzdržana glasa, donio odluku o davanju suglasnosti na finansijski plan Federalnog Zavoda za zapošljavanje za 2015. godinu i procjenom plana za 2016. i 2017. Godinu.

Stavljam na glasovanje Prijedlog Odluke o davanju suglasnosti na Odluku o usvajanju finansijskog plana Federalnog Zavoda za zapošljavanje za 2015. godinu i procjenom plana za 2016. i 2017. godinu.

Ko je za?

Protiv?

Suzdržanih?

Na temelju rezultata glasovanja konstatiram da je Dom naroda većinom glasova 47 za, bez protiv i 4 suzdržana glasa, donio Odluku o davanju suglasnosti na Odluku o usvajanju finansijskog plana Federalnog Zavoda za zapošljavanje za 2015. godinu i procjenom plana za 2016. i 2017. godinu.

Stavljam na glasovanje Prijedlog Odluke o davanju suglasnosti na Odluku o izvršavanju finansijskog plana Federalnog Zavoda za zapošljavanje za 2015. godinu, izvolite glasovati.

Tko je za?

Protiv?

Suzdržanih?



Na temelj urezultata glasovanja konstatiram da je Dom naroda Parlamenta Federacije BiH većinom glasova 47 za, bez protiv i 4 suzdržana donio Odluku o davanju suglasnosti na Odluku o izvršavanju finansijskog plana Federalnog Zavoda za zapošljavanje za 2015. godinu.

Prelazimo na 5. točku dnevnog reda a to je:

Prijedlog Odluke o davanju suglasnosti na Prijedlog finansijskog plana Federalnog Zavoda MIO za 2015. godinu. Prijedlog plana je prihvatila Vlada Federacije i dostavila Parlamentu Federacije radi razmatranja i davanja suglasnosti.

Zastupnički dom je na 5. izvanrednoj sjednici od 31. ožujka ove godine donio Odluku o davanju suglasnosti na Prijedlog plana. Da li predsjednik Vlade ima nešto? Ne. Da li predstavnik Federalnog Zavoda MIO. Očito da nema. Otvaram raspravu. Zaključujem raspravu.

Stavljam na glasovanje Prijedlog Odluke o davanju suglasnosti na Prijedlog finansijskog plana Federalnog Zavoda MIO za 2015. godinu kojeg je prihvatila Vlada FBiH. Molim vas da se izjasnite.

Tko je za?  
Ima li netko protiv?  
Suzdržanih?  
Zahvaljujem.

Na temelju rezultata glasovanja, konstatiram da je Dom naroda Parlamenta Federacije BiH usvojio Odluku o davanju suglasnosti na Prijedlog finansijskog plana Federalnog Zavoda MIO za 2015. godinu, sa 47 glasova za, bez protiv i 4 suzdržana glasa.

Zaključujem zasjedanje 2. izvanredne sjednice Doma naroda.

Ispričavam se, svim pripadnicima katoličke i pravoslavne vjeroispovjesti želim sretan i blagoslovljen Uskrs i Vaskrs.

\*\*\*

Sjednica završila sa radom u 23,21 sati.